



KEMENTERIAN TENAGA DAN SUMBER ASLI

## KERATAN SURAT KHABAR

SURAT KHABAR	:	SINAR HARIAN			
TARIKH	:	4/8/2021 (RABU)	MUKA SURAT	:	25
JABATAN	:	PERHILITAN			

### 'Awang Belantik' berjaya ditambat

**SIK-** Seekor gajah liar yang dikesan berkeliaran di sekitar Kampung Kubang Belantik di sini berjaya ditambat Jabatan Perlindungan Hidupan Liar dan Taman Negara (Perhilitan) pada Isnin.

Pengarah Perhilitan Kedah, Jamalun Nasir Ibrahim berkata, gajah jantan berusia antara 18 hingga 20 tahun dengan berat anggaran dua tan itu dikenali sebagai Awang Belantik, ditemui di kawasan kebun getah belakang rumah penduduk kampung kira-kira jam 11 pagi.

Menurutnya, Unit Tindakan Gajah (UTG) Kedah mengambil masa dua jam sebelum berjaya menangkap haiwan itu hasil aduan orang ramai.

"Sebelum ini, kita menerima aduan daripada penduduk mengatakan kehadiran haiwan terbabit memusnahkan

tanaman," katanya ketika dihubungi pada Selasa.

Beliau berkata, Awang Belantik lebih kerap hadir memandangkan kini pokok buah-buahan mengeluarkan hasil antaranya cempedak, durian, pisang dan lain-lain.

Gajah itu dikesan terpisah daripada kumpulan haiwan itu menyebabkannya bersendirian masuk ke kawasan kampung mencari makanan.

"Kita akan pindahkan gajah ini ke Hutan Simpan Belum, Perak pada Khamis ini dengan bantuan dua ekor gajah denak dari Pusat Konservasi Gajah Kebangsaan (PKGK) Kuala Gandah, Lanchang, Pahang.

"Gajah ini sudah ditambat dan menunggu pasukan PKGK yang dijangka tiba pada Rabu sebagai persiapan untuk memindahkannya," kata beliau.



Awang Belantik berjaya ditambat sebelum dipindahkan ke Hutan Simpan Belum, Perak pada Khamis.